

**Inissianik attartortitsisarneq pillugu Inatsisartut
peqquussutaata allanngortinneqarnera pillugu
Inatsisartut inatsisaat
(Attartornermut akiligassap piffissaq
akilerneqarfissaa, inissianik attartortittakkanik
oqoqalersimasunik nalunaarsuineq kiisalu
suliffimmut atatillugu inissianik oqoqarsimasunik
innersuunneqartunik itigartitsisinnaatitaaneq)**

§ 1

Inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi, kingullermik Ilinniartut ineqarfii pillugit Inatsisartut inatsisaanni nr. 42-mi, 12. december 2019-imeersumi § 50-ikkut allanngortinneqartumi, tulliuttut allanngortinneqassapput:

1. § 2, imm. 1 imatut oqaasertalerneqassaaq:

” Attartornissaq isumaqatigiissutigineqartassaaq immersugassaq Naalakkersuisunit akuerisaalluni kalaallisut qallunaatullu naqitaasoq atorlugu.”

2. § 3 imatut oqaasertalerneqassaaq:

” **§ 3.** Peqqussut attartornernut, immikkut inatsisiliaasunit aquaasunut atuutsinneqanngilaq, imaluunniit inissianut ukununga atuutsinneqassanani:

1) Namminersorlutik Oqartussat inissiaataannut attartortittakkanut Naalakkersuisunit ilaajunnaarsinneqarsimasunut.

2) kommunep inissiaataanut attartortittakkanut kommunalbestyrelsimi ilaajunnaarsinneqarsimasunut, taamaattorli tak. imm. 2.

3) Namminersorlutik Oqartussat kommunellu ilinniartut ilinniarnernut atatillugu atugassiissapput, taamaattorli tak. imm. 3.

Imm. 2. Inissianut imm. 1, nr. 2-mi pineqartunut Nunap Karsianit sananeqarnerminnut tapiiffigineqarsimasunut ilaajunnaarsitsinissamut Naalakkersuisut akuersissuteqanissaat piumasaqaataavoq.”

3. § 4, imm. 2-4 imatut oqaasertalerneqassaaq:

” Imm. 2. Peqqussut Namminersorlutik Oqartussat kommunelluunniit inissiaataanni utaqqiisaasumik sulisunut inigitinneqarallartunut tunngassuteqartunut atuutinnigilaq, tamatumani apeqqutaatinagu inissiinermut akiliuteqartitsisoqartarnersoq akiliuteqartitsisoqartanninnersorluunniit, taamaattoarli tak. imm. 3 aamma 4.

Imm. 3. Namminersorlutik Oqartussani kommuneniluunniit sulisunik inissianut utaqqiisaasumik sulisunut inigitinneqarallartunut inissinneqarallartoq sullissinermut akiliummik akiliuteqartinneqarsinnaavoq, tak. imm. 2.

Imm. 4. Utaqqiisaagallartumik inigitinneqartartut aqunneqarnerat ingerlanneqarnerallu pillugit Naalakkersuisut maleruagassiorsinnaapput, matumani akiliutigineqartartussat annertussusissaat kiisalu inissiigallarnermi aningaasartuutaasut matussusiivigineqarnissaat ilanngullugit.”

4. § 5 imatut oqaasertalerneqassaaq:

” § 5. Illuutini Namminersorlutik Oqartussanit kommunenilluunniit pigineqartuni inissiat inigineqanngitsut inissarsiortunut imatut tulleriinnilersuilluni innersuunneqartassapput, inissiat:

1) iluarsaassinernut isaterinernullu atatillugu Namminersorlutik Oqartussat kommunellu inisseeqqinnissaannut atugassat, tak. § 68.

2) attartortunut iniminnik piginneqatigiilluni inissiatut pigisatulluunniit tiguserusunngitsunut, tak. § 24, imm. 1 aamma § 24 a, imm. 1.

3) initaartinneqarnissamik siusinnerusukkut qularnaveeqqusiivigineqarsimasunut eqquutsitsiniarluni innersuunneqartussat, tak. § 58, imm. 4.

4) aapparisaq toqukkut qimagaasup atorfimmuut aalajangersimasumut inigitinneqartumik qimatsinissaanut atatillugu innersuussutigineqartussat, tak. § 63, imm. 2.

5) aapparisaq toqukkut qimagaasup inimik innarluutilimmuut immikkut aaqqissugaasumik tunniussaasimasumillu qimatsinissaanut atatillugu innersuussutigineqartussat, tak. § 63, imm. 3.

6) siunertanut aalajangersimasunut inniminnigaasut, tak. imm. 3.

7) sullissivinni sulisunut inissamut normumik atorneqanngitsumik pigisaqartunut atugassat, tak. § 9,

8) kommunet isumaginninnermi inissaqartitsinissaannut atugassat, tak. § 22,

9) nammineq kissaatigalugu nuunniartunut atugassat, tassunga ilanngullugu inigisanik paarlaannerit, tak. § 59,

10) utaqqisut allattorsimaffianni nalinginnaasumi allassimallutik inissarsiortunut atugassat, tak. § 6.

Imm. 2. Imm. 1, nr. 1 – 5 naapertorlugu inissiat innersuunneqartut naleqquttumik angissuseqartinniarneqassapput pitsaassuseqassallutillu. Ineqarnermut aningaasartuutit tamarmiut sapinngisamik inissiami qimanneqartumi aningaasartuutaasarsimasunit amerlanerunissaat pinngitsoorniarneqassaaq.

Imm. 3. Namminersorlutik Oqartussat kommunelluunniit siunertanut aalajangersimasunut atugassanik inissianik inniminniisinnaapput, tassunga ilanngullugit inissiat atorfinnut aalajangersimasunut atugassiissutigineqartussat.

Imm. 4. Naalakkersuisut kommunet ataasiakkaat isumaqatiginiareerlugit inissiat imm. 1, nr. 7-10-mi taagorneqartut qanoq agguarneqarnissaat pillugu kommunenut tamanut immikkut aalajangersaasinnaapput.”

5. § 7, imm. 3 imatut oqaasertalerneqassaaq:

” Imm. 3. Naalakkersuisut inissianik innersuussisarneq attartortitsisarnerlu, akiligassat akilersinniarneqartarnissaat akitsuutillu annertussusissaat, kiisalu utaqqisut allattorsimaffinik aqutsinissaq, taassumalu ataani utaqqisut allattorsimaffisa inissianut sunut ataneri suussusiilu pillugit maleruagassiorsinnaapput, tak. § 5, imm. 1.”

6. §§ 9-17 imatut oqaasertalerneqassapput:

“ § 9. Naalakkersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, Namminersorlutik Oqartussat inissiaataanniit tunniussassanik agguaassinnaapput. Inissianut normunut tunniunneqarsimasunut sulisitsisoq, inissianut normunik pigisaqartoq ukiumoortumik akiliuteqartinneqarsinnaavoq.

Imm. 2. Aammattaaq Namminersorlutik Oqartussani sulisunut inissiat aqunneqarnerinut akiliuteqartitsisoqarsinnaavoq, aqutsinermi aningaasartuutiviusunut matusissutissanik.

Imm. 3. Naalakkersuisut Namminersorlutik Oqartussani sulisunut inissiat aqunneqarneri ingerlanneqarnerilu pillugit maleruagassiorsinnaapput, matumani ilanngullugit ukiumoortumik sullissinermut akitsuusiissutaasartut kiisalu allaffissornikkut aqutsinermut akitsuusiissutaasartussap angissusissaasa aalajangersaavigineqartarnissaat.

§ 10. Naalakkersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, kommunalbestyrelsemut tunniussisnaapput.

Imm. 2. Kommunalbestyrelsip kommunemi taassumaluunniit sullissiviini atorfillit, inissiaq kommunep inissiaataannut attartortittakkanut ilaalluni sulisunut inissianut attuumassuteqarpat, inoqutigiinni inuit amerlassusaat inimik ataatsimik sinnerlugit tunineqassanersut aalajangersinnaavaa.

Imm. 3. Kommune sulisunut inissianik agguaassinermi aqutsineq tulleriiarinnermilu tunngavissat pillugit sukumiisunik aalajangersaasinnaavoq. Maleruagassat taamaattut Naalakkersuisunit akuerineqassapput.

§ 11. Sulisunut naalagaaffiup sullissiviini inissiamut innersuunneqarsinnaatitaallutik atorfeqartunut inissianik innersuussisarneq pillugu danskit naalagaaffiannut Naalakkersuisut Rigsombudi aqputigalugu isumaqatigiissuteqarsinnaapput.

Imm. 2. Inissiat imm. 1-imi taaneqartut inissiap piniarneqarneraniit kingusinnerpaamik qaammatit pingasut qaangiunnerini innersuunneqartarnissaat anguniarneqartassaaq.

Imm. 3. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu Namminersorlutik Oqartussat inissianik arlalinnik inniminniisarsinnaapput.

Imm. 4. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunut aalajangersimasumik isumaqatigiissuteqarnikkut.

§ 12. Inissiat Inatsisartuni sullissivinnilu taakkununga attuumassuteqartuni sulisunut inissamik innersuunneqarsinnaatitaallutik atorfinitsitaasimasunut inissiat, kiisalu inissiat allat Inatsisartunut atorfeqartussat innersuunneqartassapput, Naalakkersuisut Inatsisartullu isumaqatigiissuteqarnerat

naapertorlugu.

Imm. 2. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu, Namminersorlutik Oqartussat inissianik arlaqartunik immikkoortitassanik inniminniisarsinnaapput.

Imm. 3. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunik aalajangersimasumik isumaqatigiissuteqarneq naapertorlugu.

Imm. 4. Inatsisartuni sullissivinnilu taakkununga attuumassuteqartuni sulisunut atorfeqarnermi inissamik innersuussiffigineqarsinnaatitaasunut, inissiat §§ 16-18-imi maleruagassat malillugit innersuunneqassapput.

§ 13. Namminersorlutik Oqartussat inissiaataat, sulisunut atorfeqarnermi inissiamik innersuussiffigineqarsinnaatitaasunut innersuunneqartartussat sisamanut agguagaapput tulleriiarinerlu una malillugu innersuunneqartassallutik:

- 1) Naalakkersuisoqarfinni ataasiakkaani naalakkersuisunut pisortanullu inissiat, tak. § 14,
- 2) Namminersorlutik Oqartussat qitiusumik allaffeqarfianni immikkoortortani pisortanut assigisaannullu, akissaateqarfik 37 tassanngaanniilluunniit qaffasinnerusoq naapertorlugu akissarsiaqartinneqartunut inissiat, tak. § 15,
- 3) Namminersorlutik Oqartussat qitiusumik allaffeqarfianni allaffinni pisortanut, akissaateqarfik 36 tassanngaanniilluunniit qaffasinnerusoq naapertorlugu akissarsiaqartinneqartunut inissiat, tak. § 16,
- 4) Namminersorlutik Oqartussat qitiusumik allaffeqarfianni, sullissivinni suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersorlutik Oqartussanit pigineqartuni sulisunut allanut atorfeqarnermi inissiamik innersuussiffigineqarnissamik piginnaatitaaffeqartunut inissiat, tak. § 17.

Imm. 2. Naalakkersuisut inunnut §§ 16-imi 17-imilu taaneqartunut inissianik innersuussisarneq pillugu maleruagassiorsinnaapput.

§ 14. Naalakkersuisunut naalakkersuisoqarfinni pisortanullu inissianik innersuussisarnissamut Namminersorlutik Oqartussat inissianik, Naalakkersuisunut naalakkersuisoqarfinni pisortanullu inissiatut taagorneqartunik arlaqartunik immikkoortitassanik inniminniissapput.

Imm. 2. Naalakkersuisunut pisortanullu inissiat, tak. imm. 1, pingaarnerutillugu tassaasassapput ilaqtariinnut ataatsinut illut imaluunniit illut affarleriit.

Imm. 3. Imm. 1-imi taaneqartunut inissianik innersuussinermi inissianut ataasiakkaanut inoqutigiinni inuit qanoq amerlatiginissaat piumasaqaataanngilaq.

Imm. 4. Inissiat imm. 1-imi taaneqartut najugaqatigiiffimmut nammineq ingerlasumut, ingerlatsinermut tapiiffigineqarsinnaasumut imaluunniit ingerlatsinermi immikkut ittumik aningaasartuutitut matusissutissanik tapiiffigineqarsinnaasumut inissinneqassapput.

§ 15. Namminersorlutik Oqartussat qitiusumik allaffeqarfianni immikkoortortani pisortanut, akissaateqarfik 37 tassanngaanniilluunniit qaffasinnerusoq naapertorlugu akissarsiaqartinneqartunut inissianik innersuussinissamut Namminersorlutik Oqartussat inissianik, pisortanut inissianik taaneqartartunik arlalinnik inniminniissapput.

Imm. 2. Pisortanut inissianik innersuussinermi inissiat inoqutigiinni inuit amerlassusaat, § 19 naapertorlugu naatsorsorneqartut ininik marlunnik sinnerlugit innersuussisoqarsinnaavoq.

§ 16. Namminersorlutik Oqartussat qitiusumik allaffeqarfianni allaffinni pisortanut, akissaateqarfik 36 tassanngaanniilluunniit qaffasinnerusoq naapertorlugu akissarsiaqartinneqartunut inissiat § 17-imi taaneqartunit salliutinneqarlutik innersuunneqartassapput.

§ 17. Inunnut §§ 11-16-imi taaneqartunut inissianik innersuussinissamut pisariaqartinneqartut naammassineqarpata, inissiat Namminersorlutik Oqartussat qitiusumik allaffeqarfianni, sullissivinni suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersorlutik Oqartussanit pigineqartuni sulisunut allanut atorfeqarnermi inissiamik innersuussiffigineqarsinnaatitaasunut innersuunneqarsinnaapput.”

7. § 20, imm. 2 imatut oqaasertalerneqassaaq:

“ *Imm. 2.* Naalakkersuisut sulisorisap soqutigisaqatigiiffik isumaqatigiinniarsinnaasoq ilaasortaaffigisaq isumaqatigiissuteqarfigisinnaavaa inissianik immikkut ittunik innersuussisarneq pillugu.”

8. § 20-p kingorna ilanngunneqassaaq:

” **§ 20 a.** § 20-mi, imm. 1-imi allassimasut apeqqutaatinnagit, inissiat ukiut kingulliit tallimat iluini oqoqarsimasutut attartortitsisup nalunaarsuiffianni inissiaq allassimappat, atorfilik sulisunut inissiamik innersuunneqartumik itigartitsisinnaavoq, takuuk § 32 a, taamaaliornerminilu sulisunut inissiamik innersuunneqarsinnaatitaanini, inissinneqarallarnermi ajunngitsorsiassaqaarsinnaatitaanini imaluunniit sulisitsisup akiligaanik inissinneqarallarnerninik ingerlatsiinnarsinnaatitaanini annaassanngilaa.”

9. § 21, imm. 4 imatut oqaasertalerneqassaaq:

“ *Imm. 4.* Imm. 1-3 naapertorlugit pisinnaatitaaffik atuutissanngilaq:

- 1) Inissianut Naalakkersuisunut naalakkersuisoqarfinni pisortanullu inniminnerneqarsimasunut, tak. § 14.
- 2) Pisortanut inissianut, Namminersorlutik Oqartussat qitiusumik allaffeqarfiani immikkoortortani pisortanut inniminnerneqarsimasunut, tak. § 15.
- 3) Inissianut siunertanut aalajangersimasunut imaluunniit atorfinnut aalajangersimasunut inniminnerneqarsimasunut, tak. § 5, imm. 3.”

10. § 24, imm. 1-2 imatut oqaasertalerneqassapput:

“ **§ 24.** Namminersorlutik Oqartussat imaluunniit kommunip inissiaataasa attartortittakkat ilaanni attartortut piginneqatigiilluni inissiaatillit peqatigiiffiannik pilersitsisimappata, aammalu inissianik attartukkaminik piginneqatigiilluni inissiatut tigusinissaminik Namminersorlutik Oqartussanut imaluunniit kommunimut qinnuteqarsimappata, attartortitsisup §§ 5-imi aamma 65-imi aalajangersakkat sanioqqussinnaavaat. Piffissamit qinnuteqarfiusumit Namminersorlutik Oqartussat imaluunniit kommunip piginneqatigiilluni inissiaatillit peqatigiiffiat inummik, piginneqatigiilluni inissiaatillit peqatigiiffiata utaqqisunut allattuiffiani allatsisimasumik inissiamut inueruttumut innersuussinissamut piginnaatissinnaavaa.

Imm. 2. Namminersorlutik Oqartussat imaluunniit kommunip attartortoq, tak. imm. 1, inissiamik

najukkaminik piginneqatigiilluni inissiatut tigusinissamik kissaateqanngitsoq illoqarfimmi najukkamini inissiamik najugaata taamaaqataanik neqeroorfigissavaa. Inissiaq angissutsimigut neqeroorutip saqqummiunnerani inoqutigiinni inuit amerlassusaannut naapertuutissaaq, tak. § 6, imm. 2 aamma 3.”

11. § 24, imm. 6 imatut oqaasertalerneqassaaq:

“ Imm. 6. Attartorneq imm. 5 naapertorlugu ingerlatiinnarneqassappat, attartortup Namminersorlutik Oqartussanut imaluunniit kommunimut pisinnaatitaaffii atuutsinneqarsinnaasut taamaallaat tassaassapput, Namminersorlutik Oqartussat imaluunniit kommunip piginneqataasutut piginneqatigiilluni inissiatillit peqatigiiffiannut pisinnaatitaaffigisai.”

12. § 24 a, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunit illuutaanni attartortittakkani annerpaamik 16-inik inissartaqartuni attartortut affaat sinnerlugit inissiamik piginnittut peqatigiiffiannik pilersitsisimappata, aammalu inissianik attartortittakkanik inissiatut nammineq pigisatut tigusinissamik allakkatigut Namminersorlutik Oqartussanut imaluunniit kommunimut qinnuteqaateqarsimappata, attartortitsisup §§ 5-imi aamma 65-imi aalajangersakkat sanioqqussinnaavai.”

13. § 25, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutaat, tassaasut illut quleriinnik initallit, illut sanileriit illullu uiguleriit ikinnerpaamik pingasunik atasunik inissiatallit, najugaqatigiiffinnut aningaasaqarnikkut imminnut ingerlattunut agguarneqarsinnaapput.”

14. § 25, imm. 3 imatut oqaasertalerneqassaaq:

“ Imm. 3. Naalakkersuisut Namminersorlutik Oqartussat kommunellu ilaqutariinnut arlalinnut illuutaasa najugaqatigiiffinnut agguarneqarnissaat, najugaqatigiiffinni siulersuisunut qinersisarneq najugaqatigiiffinnilu siulersuisut sulinerat, matumani ilanngullugit najugaqatigiiffinni siulersuisut najugaqartunut aningaasaliissutiniq atuinissaannut maleruagassat pillugit aalajangersaasinnaapput.”

15. § 27, imm. 2 imatut oqaasertalerneqassaaq:

“ Imm. 2. Naalakkersuisut najugaqartut sinniisissaannik qinersisarneq najugaqartullu sinniisaasa sulinerat, taassuma ataani taakku illuutini attartortittakkani namminersortuni pigisani sunnuteqaqataasinnaanerit pillugu maleruagassiorsinnaapput.”

16. §§ 28-32-mut immikkoortumi qulequtaq imatut oqaasertalerneqassaaq:

“*Namminersorlutik Oqartussat kommunellu inissiaataat attartortittakkat*”

17. § 28, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutaanni najugaqatigiiffimmi inissianik attartortitsinermit isertitat tamakkiisut sukkulluunniit annertussusilerneqarnerini, najugaqatigiiffiup aningaasartuutiniq tamanik akiliisinnaanissaa periarfissinneqassaaq, matumani ilanngullugit aningaasaliissutinit iluanaarutinit illumik piginnittumut akiliutitut aningaasartuutit, tak. § 31, aamma ingerlatsinermit atatillugu aningaasartuutit, matumani ilanngullugit allaffissornikkut

aqutsinermut akiliutit, tak. § 32, imm. 1-6, aserorterisarnermik pinaveersaartitsinermut akiliutit, tak. § 32, imm. 7, aamma akiliutissatut illuartitalu aalajangikkat.”

18. § 28, imm. 5 imatut oqaasertalerneqassaaq:

“ *Imm. 5.* Naalakkersuisut pilersaarutaasumik aserfallatsaaliuinissamut teknikikkullu atortulersuutiniq nutarterinissamut illuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsineqarnissaanut siumoortumik ilisimatitsisarneq pillugu maleruagassiorsinnaapput.”

19. § 29, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutai kingusinnerpaamik 2010-mi imermut uuttuusersorneqarsimassapput, taamaalilluni illuummi imermik nillertumik kissartumillu atuinermit tamakkiisumut aningaasartuutitut naatsorsukkat immikkut atuneq malillugu attartukkanut ataasiakkaanut agguanneqarsinnaassallutik, taamaattorli tak. imm. 2.”

20. § 30, imm. 1-2 imatut oqaasertalerneqassapput:

“ Ilaqutariinnut ataatsinut illut illullu affarleriit Namminersorlutik Oqartussanit kommunenillu pigineqartut ingerlatsinermut aserfallatsaaliuinernullu immikkoortortaqaqfinnut, aningaasaqarnikkut imminnut ingerlattunut agguarneqassapput. Kommunep ilaqutariinnut ataatsinut illut illullu affarleriit ingerlatsinermut aserfallatsaaliuinernullu immikkoortortaqaqfimmuut ataatsimut amerlanerusunulluunniit agguassavai. Ilaqutariinnut ataatsinut illut illullu affarleriit Namminersorlutik Oqartussanit pigineqartut ingerlatsinermut aserfallatsaaliuinernullu immikkoortortaqaqfimmuut, Kalaallit Nunaanni ilaqutariinnut ataatsinut illunik illunillu affarleriinnit Namminersorlutik Oqartussanit pigineqartunit tamanit peqataaffigineqartumut ataatsimoortinneqassapput, matumanili Naalakkersuisunut pisortanullu inissiat, tak. § 14, imm. 1, ingerlatsinermut aserfallatsaaliuinernullu immikkoortortaqaqfimmuut imminut ingerlattumut, tak. § 14, imm. 4, inissinneqartut pineqanngillat.

Imm. 2. Namminersorlutik Oqartussat kommunellu ilaqutariinnut ataatsinut illuutaanni illuutaannilu affarleriinni ingerlatsinermut aserfallatsaaliuinernullu immikkoortortaqaqfup inissiaataanik attartortitsinermi akiliutip sukkulluunniit annertussusilerneqarnerani, ingerlatsinermut aserfallatsaaliuinernullu immikkoortortaqaqfup aningaasaliissutinit iluanaarutitut aningaasartuutiniq, tak. § 31, aamma ingerlatsinermut aningaasartuutiniq inissiamik piginnittumut akiliisinnaanissaa periarfissinneqassaaq, matumani ilanngullugit allaffissornikkut aqutsinermut akiliutit, tak. § 32, imm. 1-6, matumani aningaasartuutit attartortumit toqqaannartumik akilerneqartut pinnagit, tak. imm. 7.”

21. § 30, imm. 8 imatut oqaasertalerneqassaaq:

“ *Imm. 8.* Naalakkersuisut pilersaarutaasumik aserfallatsaaliuinissamut teknikikkullu atortulersuutiniq nutarterinissamut illuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsivigineqartarnissaanut siumoortumik ilisimatitsisarneq pillugu maleruagassiorsinnaapput.”

22. § 31, imm. 1 imatut oqaasertalerneqassaaq:

“ Ukiumoortumik Namminersorlutik Oqartussat kommunellu aningaasaliissutinit iluanaarutissaat illuutip sananeranut akiusup 1,5%-iannik annertussuseqassaaq.”

23. § 31, imm. 7 imatut oqaasertalerneqassaaq:

“ Imm. 7. Naalakkersuisut imm. 3 aamma 4 malillugu teknikimut aningaasaqarnermullu naliliinissap qanoq ingerlanneqarnissaa pillugu maleruagassiorsinnaapput.”

24. § 32, imm. 6-8 imatut oqaasertalerneqassapput:

“ Imm. 6. Naalakkersuisut Namminersorlutik Oqartussat kommunellu inissiaataasa attartortittakkat allaffissornikkut aqunneqarnerat ingerlanneqarnerallu, matumani ilanngullugit ilaatigut allaffissornikkut aqutsinermut akiliutip immikkoortui, tunngaviusumik ilassutitullu sullissinerit immikkoortiterneri, akiliutit kiffartuussinernullu akiliutit immikkoortiterneri, aningaasaliissutinik allaffissornikkut aqutsineq, missingersuusiorneq, naatsorsuutinik saqqummiussisarneq kukkunersiuinerlu pillugit maleruagassiorsinnaapput.

Imm. 7. Attartortitsisup Namminersorlutik Oqartussat kommunellu ilaqutariinnut arlalinnut illuutaanni attartortut akiliisissinnaavai, najugaqatigiiffimmi aserorterisarnermik pinaveersaartitsinermut atatillugu aningaasartuutitut naleqquttunut matussutissanik.

Imm. 8. Attartortitsisup inissiaataasa inissisimaffiannut pitsanngorsaanissamut imaluunniit aningaasaleeqqinnissamut aningaasartuutitut matussutissanik attartortitsisoq Namminersorlutik Oqartussat kommunillu ilaqutariinnut arlalinnut illuutaanni attartortutut akiliisitsissinnaavoq. Akiliutissap annertussusissaa ukiumi pineqartumi Inatsisartut aningaasanut inatsisaanni oqaasertaliussinikkut annertussusilerneqassaaq.”

25. § 32 kingorna qulequtaq imatut oqaasertalerneqassaaq *“Namminersorlutik Oqartussat kommunellu inissiaataat attartortittakkat:*

” § 32 a. Namminersorlutik Oqartussat imaluunniit kommunit inissiaataat attartortittakkat, ukiut tallimat kingulliit iluini oqoqarsimasut nalunaarsorneqassapput. Inissiaq qaqugukkut oqoqarsimanersoq, qanoq annertutigisumik oqoqarsimanersoq, oquijaanerlu pillugit attartortitsisoq nalunaarsuissaaq.

Imm. 2. Oquk patsisaalluni inissiaq attartortittagaq nutarterneqarsimappat, inissiarlu attuumassuteqanngitsumit paasisimasalimmiillu misissuinikkut oqoqarunnaarsimasutut uppersarsarneqarsimappat, imm. 1 naapertorlugu nalunaarsuinissaaq pinngitsoortinneqarsinnaavoq. Inissiaq oqoqarunnaarsimasooq misissuinerup uppersarsassavaa.

Imm. 3. Nalunaarsuinissaaq pillugu, matumani inissiat attartortittakkat sulisunut inissiatut atorneqartut kisimik nalunaarsorneqarnissaa kiisalu inissiat attortittakkat annertugisassaangitsumik oqoqartut nalunaarsorneqartariaqannginnerat ilanngullugit, Naalakkersuisut malittarisassanik aalajangersaasinnaapput.

§ 32 b. §§ 11, 12, 15, 16, 17-ilu innersuussutigalugit atorfillip sulisunut inissiaq § 32 a naapertorlugu nalunaarsorneqarsimalluni Namminersorlutik Oqartussanit imaluunniit kommunimit pigineqarluni innersuunneqartoq tigujuumangippagu, Namminersorlutik Oqartussat imaluunniit kommuni najugaqarfimmut ingerlatsinermut tapiissuteqassaaq. Inissiaq attartortittagaq allamut attartortinneqarsinnaangippat ingerlatsinermi tapiissutit tunniunneqassapput, tamatumalu kingunerisaanik najugaqarfiup amigartoorutit ingerlatsinermut missingersuutini matussusersinnaassavai. Atuineq ilanngunnagu qaammammut attartornermi akiligassaaq, ingerlatsinermi tapiissutit

naleqqatigissavai. Ukiumut ataasiarluni ingerlatsinermut tapiissuteqartoqarsinnaavoq, inissiamullu ataatsimut annerpaamik pingasoriarluni ingerlatsinermut tapiissuteqartoqarsinnaalluni.”

26. § 33, imm. 4 imatut oqaasertalerneqassaaq:

“ *Imm. 4.* Illuutip teknikikkut aningaasaqarnikkullu nalingata naatsorsorneqarnerani periaatsit Naalakkersuisunit aalajangersarneqartut malinneqassapput, tak. § 31, imm. 7.”

27. § 37, imm. 1 imatut oqaasertalerneqassaaq:

“ Attartornerup aallartinnerani Namminersorlutik Oqartussat kommunellu inissiaataanni attartortittakkani attartortut qularnaveeqqusiissut, qaammatini pingasuni ineqarnermut akiliutissap annertoqataanik annertussusilerneqartoq attartortitsisumut tamakkerlugu akilissavaat. Attartortup attartornerup aallartinnerani qularnaveeqqusiissutissaq tamakkerlugu akilersinnaanngikkuniuk, attartortup akiligassaq qaammatinut aqqaneq-marlunnut angeqqatigiinnut aggorlugu qaammatikkaartumik akilersorsinnaavaa, tak. imm. 7.”

28. § 37, imm. 7 imatut oqaasertalerneqassaaq:

“ *Imm. 7.* Naalakkersuisut qularnaveeqqusiissuteqartarnek pillugu maleruagassiorsinnaapput.”

29. § 38 tulliuttutut oqaasertalerneqassaaq:

” **§ 38.** Attartortoq pisussaavoq ineqarnermut, imermut kiassarnermullu akiligassanik, attartornermut isumaqatigiisummi aalajangersarneqartumi akiliinissamut piffissaq eqqorlugu akiliisassalluni.

Imm. 2. Attartornissamut isumaqatigiisummi allatut aalajangersagaqanngippat ineqarnermut, imermut kiassarnermullu qaammammi pineqartumi akiligassat qaammatip naanerani aningaaseriviit ulloq kingulleq ammasarfini qaammammut siumoortumik akilerneqartassapput. Ineqarnermut, imermut, kiassarnermullu akiligassat qaammammut naatsorsorneqaratik piffissamut allamut akilerneqartussatut naatsorsorneqartut, aningaaseriviit ulloq kingulleq ammasarfini piffissamut pineqartumut siumoortumik akilerneqartassapput. Piffissaagallartillugu akiliineq, ullormi akiliiffissatut kingullermi kingusinnerpaamik akiliisoqartassaaq.

Imm. 3. Attartortitsisoq akiliiffissamik akileeriaasissamillu innersuussissaaq. Aningaaserivikkut akiliineq akiliiffissatut innersuunneqartumut akiliinertut isigineqassaaq. Akiliiffissamik innersuussisoqarsimanngippat ineqarnermut akiliut attartortitsisup niuernermik ingerlataqarfianut imaluunniit attartortitsisoq avataaniit aqutsisumik atuippat, taassuma niuernikkut ingerlataqarfianut akilerneqassaaq.”

30. § 41, imm. 4 imatut oqaasertalerneqassaaq:

“ *Imm. 4.* Naalakkersuisut kiassarnermut naatsorsuusiorneq, aningaasartuutit attartortunut agguarneqartarnerat, akiliisarnek aamma kiassarnermut akiliutissat iluarsivigineqartarnerat pillugit maleruagassiorsinnaapput.”

31. § 44, imm. 6 imatut oqaasertalerneqassaaq:

“ *Imm. 6.* Naalakkersuisut atuaasarneq imermullu atukkamut akiliisitsisarnek, kiisalu imermut naatsorsuusiortarnek pillugu sukumiisunik maleruagassiorsinnaapput.”

32. § 45, imm. 1 imatut oqaasertalerneqassaaq:

“ Namminersorlutik Oqartussat kommunillu inissiaataanni attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaa attartortitsisup pisussaaffigaa.”

33. § 51, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunet inissiaataanni attartortittakkani attartortoq siumoortumik attartortitsisoq akuersiteqqaarlugu nammineq akilikkaminik attartukkami atortulersuutinik nalinginnaasunik ikkussuinissamut pisinnaatitaavoq, tamatumani attartortitsisup illuutip innaallagissamut kuuffinnullu atortuisa pisinnaasai atortulersuutitut naammanngitsut qularnaarsimangippagu.”

34. § 52, imm. 1 imatut oqaasertalerneqassaaq:

“ Namminersorlutik Oqartussat kommunellu inissiaataanni attartortittakkani attartortut kommunemi najukkamilu pilersaarutit ataqqillugit ataasiakkaarlutik imaluunniit ataatsimoorlutik illumi attartortitsisup innersuussineratigut radiop TV-llu aallakaatitaannik tigooqqaanissamut radiomut fjernsynimulluunniit antenniliisinnaatitaapput, taamaattorli tak. imm. 2. Taamatuttaaq attartortut illumi radiup TV-llu aallakaatitaannik isiginnaarnissamut kabelikkut attaviliisinnaatitaapput, najugaqarfimmi TV-mut kabelinut attaviliinissaq periarfissaqarpat.”

35. §§ 53-55 imatut oqaasertalerneqassapput:

“ **§ 53.** Namminersorlutik Oqartussat inissiaataanni attartortittakkami attartortoq attartortitsisoq siumut allakkatigut akuersissuteqarteqqaarlugu inunnik isumaginninnermi inatsisini aalajangersakkat malillugit iluaqusersuutinik ikkussuisinnaatitaavoq. Attartortitsisup attartortoq attartukkaminik qimatsinermini inissiap pissusiatut pilersitseqqinnissaa aamma kommunalbestyrelsi inissiap pissusaatut pilersitseqqinnermut aningaasartuutit akilernerneqarnissaannut qularnaveeqqusiinissaa piumasaqaatigisinnaavaa. Attartortup attartortitsisoq iluaqusersuutit ikkussuunneqannginneranni kingusinnerpaamik sapaatit akunnerinik arfinilinnik sioqqutsilluni ilisimatitsissuteqarfigissavaa.

§ 54. Namminersorlutik Oqartussat kommunelluunniit inissiaataanni attartortittakkami attartortoq ajoqusikkanut, attartortut ataasiakkaat §§ 51 aamma 52 malillugit ikkussuussimasaannik pissuteqartunut taarsiinissamut akisussaavoq.

Imm. 2. Attartortup taarsiisussaataitanera iluarseeqqinnermi imaluunniit attartortitsisup atortulersuutinik tigusernerani atorunnaassaaq.

§ 55. Namminersorlutik Oqartussat kommunelluunniit inissiaataanni attartortittakkami attartortoq attartortitsisumit siumut allaganngorlugu akuersissummik peqqaarluni inissiami silataanilu erseqqissumik aalajangikkanik pitsanngorsaasinnaatitaavoq il.il., inissiamiillu nuunnermini aningaasartuutigisimasani uppersaaserneqartut aningaasanngorlugit taarsertinnissaannut pisinnaatitaalluni, tak. §§ 56 aamma 57.

Imm. 2. Attartortoq attartortitsisumit akuerineqarani attartukkamik allannngortiterisimappat, attartortoq attartortitsisumut tamanna pillugu taarsiissuteqarnissamut akisussaatinneqassaaq.”

36. § 57 imatut oqaasertalerneqassaaq:

“ **§ 57.** Naalakkersuisut attartortup pitsanngorsaavigisinnaasai suliarisinnaasaalu allat, naatsorsuisarneq ajunngitsorsiasanullu akiliisarneq pillugu sukumiinerusunik maleruagassiorsinnaapput.

Imm. 2. Attartortitsisoq §§ 51 aamma 55 naapertorlugit qinnuteqaatinik suliarinninnerminut sullissinermut akiliuteqartoqarnissaaq piimasaqarsinnaavoq. Naalakkersuisuniit sullissinermut akiliutip annertussusissaa aalajangerneqassaaq. Sullissinermut akiliutissaq qinnuteqaatip tunniunneqarnerani akilerneqassaaq.”

37. § 58, imm. 4 imatut oqaasertalerneqassaaq:

“ *Imm. 4.* Namminersorlutik Oqartussat kommuunillu inissiaataanni attartortittakkani najugaqartut inigisaminnik allamut attartortitsigallarnissamut taarsiullugu pisinnaatitaapput, piffissap peqarfiginngisassamik naanerani inissiamut allamut innersuunneqarnissamut qularnaveeqqusiivigineqarsinnaagunik attartornerminnik unitsitsinissamut, tak. § 5, imm. 1, nr. 3.”

38. § 58, imm. 8 imatut oqaasertalerneqassaaq:

“ *Imm. 8.* Naalakkersuisut attartukkamik attartortitsigallarneq ineqarnermullu qularnaveeqqusiissut pillugit maleruagassiorsinnaapput.”

39. § 59, imm. 1 imatut oqaasertalerneqassaaq:

“ Namminersorlutik Oqartussat kommunelluunniit inissiaataanni attartortittakkani attartortut nammineq kissaatigalugu nuunnissamut allattuiffimmut allatsissinnaapput.”

40. § 59, imm. 8 imatut oqaasertalerneqassaaq:

“ *Imm. 8.* Namminerisamik kissaateqarluni nuussinnaaneq aamma inigisamik paarlaasseqatigiissinnaaneq pillugit Naalakkersuisut maleruagassanik erseqqinnerusunik aalajangersaasinnaapput.”

41. § 68, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunep inissiamik attartukkamik nutarterinissaq isaterinissarluunniit pissutigalugu attartorneq atorunnaarsissappagu, tak. § 67, nr. 2, attartortoq inissiamik taartissamik innersuussivigineqassaaq, tak. § 5, imm. 1, nr. 1. Inissiamik taartissamik innersuussisussaatitaaneq taamaallaat atuutissaaq, attartortup attartornermut isumaqatigiisummi Namminersorlutik Oqartussanit kommunemilluunniit attartornermik atorunnaarsitsinerup nalaani attartornissamik isumaqatigiisummik attartortoq eqqortitsisimappat.”

42. § 69, imm. 2 imatut oqaasertalerneqassaaq:

“ *Imm. 2.* Attartortup atorunnaarsitsissut akueriumanngikkuniuk, attartortoq atorunnaarsitsissutip tiguneraniit sapaatit akunneri arfinillit qaangiutsinnagit allakkatigut akerliliissuteqassaaq. Attartortitsisup atorunnaarsitsissut atuutsinnarniarlugu kissaatiguniuk, attartortitsisoq sapaatit akunneri qaavatigut arfinillit qaangiutsinnagit eqqartuussivimmi suliaassanngortitsissaaq. § 67, nr. 2 aamma 3 naapertorlugit Namminersorlutik Oqartussat kommunellu inissiaataanni attartortittakkani attartornermik atorunnaarsitsinerup akerliliissut kinguartitsigallarnermik kinguneqarsinnaanngilaq.”

43. § 76, imm. 3 imatut oqaasertalerneqassaaq:

“ Imm. 3. Naalakkersuisut Namminersorlutik Oqartussat kommunellu inissiaataanni attartortittakkani attartornermik atorunnaarsitsisarneq pillugu maleruagassiussapput.”

44. § 77, imm. 5 imatut oqaasertalerneqassaaq:

“ Imm. 5. Naalakkersuisut inissiamit aninermi nalinginnaasumik iluarsaassisarneq aamma attartortup tamatumunnga atatillugu aningaasartuutigisaanut ajunngitsorsiassaqaqtarneq pillugu maleruagassiorsinnaapput.”

45. § 81 imatut oqaasertalerneqassaaq:

“ § 81. Namminersorlutik Oqartussat kommuneluunniit inissianik allaffissornikkut aqutsisussamik avataaniit pissarsisimappat, Naalakkersuisut imaluunniit Kommunalbestyrelsep nakkutigissavaa, inissianik allaffissornikkut aqutsisup suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit suliarinerai.

Imm. 2. Kommune nammineerluni inissiaatiminik allaffissornikkut aqutsinermik isumaginnittuuguni, kommunep suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit isumagissavai.

Imm. 3. Namminersorlutik Oqartussat kommuneluunniit aningaasatigut nakkutilliisussaaitaanini, tak. imm. 1, naammassiniarlugu inissianik allaffissornikkut aqutsisup kukkunersuiisua inissianik allaffissornikkut aqutsisup suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit suliarinerai nalunaarusiortissinnaavaa.

Imm. 4. Kommune inissiaatiminik nammineq allaffissornikkut aqutsisup ukiumoortumik suliassat Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit isumagineqarnerat pillugu kukkunersuiisuni ukiumoortumik nalunaarusiortittassavaa.

Imm. 5. Namminersorlutik Oqartussat imaluunniip kommunip imm. 1 naapertorlugu nakkutilliinera ilaatigut aningaasatigut ingerlatsinermik nakkutilliinermut ilaatigullu avataaniit aqutsisup allaffissornermi suliassaanik allanik nakkutilliinermut tunngasuvoq.

Imm. 6. Naalakkersuisut Namminersorlutik Oqartussat kommunellu inissiaataat attartortittakkat najugaqatigiiffillu nakkutigineqarnerat, matumani ilanngullugit inissianik piginnittup imaluunniit aqutsisup aningaasaatinik aqutsinera, missingersuusiortarnera, naatsorsuutininik saqqummiisarnera kukkunersuiisoqarneralu, pillugu maleruagassiorsinnaapput.”

46. §§ 82-83 imatut oqaasertalerneqassapput:

“ § 82. Namminersorlutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit, tak. § 84, suliarineqarnissaannut Naalakkersuisut ineqarneq pillugu maalaaruteqartarfimmik pilersitsisinnaapput, taannalu siulittaasoqassaaq maalaaruteqartarfimmilu pingasunik nalinginnaasunik ilaasortaqaassalluni.

Imm. 2. Siulittaasoq taassumalu sinniisissaa Naalakkersuisup ineqarneq pillugu suliassaqaqarfimmut akisussaasuusup innersuussuteqarneratigut Naalakkersuisunit toqqarneqassapput, taakkulu marluullutik ineqarnermi pissutsinut immikkut ilisimasaqassapput imaluunniit inatsilerituutut soraarummeersimassallutik. Maalaaruteqartarfimmut ilaasortaq ataaseq taassumalu sinniisissaa INI A/S-p

innersuussuteqarneratigut Naalakkersuisunit toqqarneqassapput. Maalaaruteqartarfimmut ilaasortaq ataaseq taassumalu sinniisissaa kommunet ataatsimoorussillutik inassuteqarneratigut Naalakkersuisunit toqqarneqassapput, aammalu maalaaruteqartarfimmut ilaasortaq ataaseq taassumalu sinniisissaa Ineqartut Peqatigiiffisa Kattuffiata IPK-p inassuteqarneratigut Naalakkersuisunit toqqarneqassallutik, taamaattorli tak. imm. 6. Maalaaruteqartarfimmut ilaasortat pingasut nalinginnaasut taakkulu sinniisissaat ineqarneq pillugu sulianut tunngasunik ilisimasaqassapput.

Imm. 3. Siulittaasumik, ilaasortanik sinniisissanillu toqqaaneq ukiut sisamat tikillugit atuuttassaaq.

Imm. 4. Siulittaasoq sinniisissaaluunniit piginnittut kattuffiannut, inissiaatileqatigiit kattuffiannut imaluunniit attartortut kattuffiannut immikkut attuumassuteqartuussanngilaq, imaluunniit inuussutissarsiutigalugu illuutiniq nioqquteqarnermut akuliussimasuussanani.

Imm. 5. Maalaaruteqartarfimmut ilaasortaq sinniisussaaluunniit pissusissamisoortumik aggersarneqareernermini maalaaruteqartarfimmut aggernissamut pisussaataitavoq. Naalakkersuisut ineqaneq pillugu maalaaruteqartarfimmi ataatsimiinnissamut takkutinngitsoornerup kingunerisassai pillugit sukumiinerusunik maleruagassiorsinnaapput.

Imm. 6. IPK maalaaruteqartarfimmut ilaasortassamik toqqaanngippat, maalaaruteqartarfimmut ilaasortassamik innersuussisinnaatitaaneq suliniaqatigiiffinnut ukununga, taaneqartut tulleriaarneri malillugit tutsinneqassaaq: SIK, IMAK aamma PPK.

§ 83. Naalakkersuisut maalaaruteqartarfiup atorussatut pisariaqartitaannik atugassiissapput, aammalu pisariaqartitsinikkut allaffeqarfimmiit ikiorneqarnissaat isumagissallugu.

Imm. 2. Maalaaruteqartarfiup sulineranut aningaasartuutit Naalakkersuisunit akilerneqartassapput, matumani ilanngullugit siulittaasup ilaasortallu suliaminnut atatillugu akiliussigallarnerannut, tak. imm. 5, kiisalu allaffissornermut il.il. aningaasartuutit. Ineqarneq pillugu maalaaruteqartarfimmi ilaasortat Inatsisartunut, Naalakkersuisunut il.il. ilaasortat akissarsiaqartitaanerit pillugu Inatsisartut inatsisaanni maleruagassat naapertorlugit akissarsiaqartinneqassapput, ullormusiaqartinneqarlutik angalanermilu aningaasartuutitut ajunngitsorsiassaqartinneqassallutik. Aningaasartuutit taakku ukiumoortumik Nunap Karsianit tapiissutigineqartut iluanniit akilerneqartassapput.

Imm. 3. Maalaaruteqartarfik oqarasuaatit atorlugit ataatsimiissinnaavoq, maalaaruteqartarfimmi ilaasortat tamarmik illoqarfimmi, maalaaruteqartarfiup allattoqarfeqarfigisaani najugaqanngippata.

Imm. 4. Ineqarneq pillugu maalaaruteqartarfik ukiumoortumik nalunaarummik saqqummiussisassaaq, ilaatigut suliassat takkuttut suliallu naammassineqartut pillugit kisitsitigut takussutissanik, kiisalu aalajangiisarnerit ataasiakkaat inernerinik naatsunngorlugit saqqummiunneqarnerinik imaqartunik.

Imm. 5. Aningaasartuutitut imm. 2-mi taaneqartunut matussutissatut, Naalakkersuisut attartortitsisoq peqqusinnaavaat ukiumoortumik ineqarnermut akiliutit aqqutigalugit akiliutissat attartortunut ataasiakkaanut akilerseqqullugit akileqqullugillu. Attartortitsisup akiliutissat ukiumi akiliiffusussami kingusinnerpaamik januaarip ulluisa 31-anni Naalakkersuisunut akilissavai. Akiliutissaq piffissaq eqqorlugu akilerneqanngippat, Naalakkersuisut missingiillutik pisassanik attartortitsisumut ilanngaateqarsinnaapput. Akiliutissaq ukiumoortumik Inatsisartut aningaasanut inatsisaannut oqaasertaliinikkut annertussusilerneqartassaaq.

Imm. 6. Naalakkersuisut maalaaruteqartarfiup suliai, matumani ilanngullugit ataatsimiittarnerit akuttussusissaat suleriaasissarlu pillugit sukumiinerusunik maleruagassiorsinnaapput.”

47. § 85, imm. 7 imatut oqaasertalerneqassaaq:

“ Imm. 7. Siulittaasup maalaaruteqartarfiup allattoqarfia noqqaaffigisinnaavaa inissiaq maalaarutigineqartoq suliamut attuumassuteqanngitsunit takuniarlugu misissorteqqullugu. Suliami pineqarlutik ilaasut sivikinnerpaamik sapaatip akunnera ataaseq sioqqullugu aggersarneqassapput. Takuniaalluni misissuinnermut aningaasartuutit Naalakkersuisunit akilerneqassapput.”

48. § 86, imm. 6 imatut oqaasertalerneqassaaq:

“ Imm. 6. Ineqarneq pillugu maalaaruteqartarfiup aalajangiineri Namminersorlutik Oqartussanut kommunenullu, inissianik attartortitsisuusunut pinngitsoorani malinneqassapput. Namminersorlutik Oqartussat kommuneluunniit avataaniit allaffissornikkut aqutsisumik isumaginnittuutitaqarpata, maalaaruteqartarfiup aalajangiineri aamma taakkununga pinngitsoorani malinneqassapput.”

§ 2

Inatsisartut inatsisaat ullormi 1. januar 2022 atuutilissaaq.

Imm. 2. § 1, nr. 8 aamma 25 piffissaq atuutilerfissaat pillugu Naalakkersuisut tamanna pillugu nalunaarutikkut aalajangersaanerisigut pissaaq.

Namminersorlutik Oqartussat, ulloq 1. december 2021

Múte Bourup Egede
Naalakkersuisut Siulittaasuat

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut

